



ASUNTO: Memoria xustificativa do Convenio de colaboración entre a AXENCIA GALEGA DA INDUSTRIA FORESTAL e FUNDACIÓN ARUME, para o estudo, dinamización sectorial, promoción e posta en valor da cadea monte-industria de Galicia nos anos 2026 e 2027

I. ANTECEDENTES

Primeiro.– A AXENCIA GALEGA DA INDUSTRIA FORESTAL, creada polo Decreto 81/2017, do 3 de agosto, ten entre as súas funcións o impulso da investigación aplicada, a innovación tecnolóxica e a mellora da competitividade do sector forestal galego, así como o apoio á transferencia de coñecemento entre o ámbito investigador e o tecido produtivo.

Segundo.– Consonte ao artigo 2 do Decreto 81/2017, do 3 de agosto, polo que se crea a Axencia Galega da Industria Forestal e se aproban os seus estatutos, a Axencia ten entre os seus obxectivos procurar a diversificación dos produtos do monte destinados á industria forestal, promovendo sinerxías entre os distintos sectores da cadea monte-industria, mellorar a competitividade e a innovación das empresas do sector forestal desde a primeira fase de transformación do recurso e con especial incidencia na segunda e seguintes fases, así como incentivar a divulgación e formación sobre actividades coherentes coa conservación do patrimonio natural e a biodiversidade, e coa xestión sustentable dos recursos, así como favorecer a transferencia de coñecemento e tecnoloxía entre os diferentes axentes vinculados á cadea forestal-madeira

Terceiro.– A Fundación Arume é unha entidade privada sen ánimo de lucro, dotada de personalidade xurídica e patrimonio propio e con plena capacidade de actuación e que ten, entre os seus fins fundamentais, promover o valor e uso dos montes galegos e que aspira a converterse na referencia en Galicia na integración da cadea monte-industria, desde a propiedade forestal ata a transformación da madeira. No seu Padroado, están representadas asociacións de propietarios forestais, asociacións de viveiristas, empresas de servizos forestais, entidades industriais (adicadas ao aproveitamento e serrado da madeira e á fabricación taboleiros), universidades e entidades financeiras.

Cuarto.– A sinatura deste convenio responde a razóns de interese público, social e económico, na medida en que as actuacións previstas contribúen á promoción da xestión forestal activa e sustentable dos montes galegos e á dinamización económica da cadea monte-industria.





A colaboración coa Fundación Arume permite impulsar proxectos estratéxicos como a mellora do estado fitosanitario das masas de coníferas, o apoio á investigación e á formación especializada, a sensibilización e o fomento da transferencia de coñecemento técnico e científico nos ámbitos intra e extra sectorial e á cidadanía en xeral así como o desenvolvemento de novos produtos e mercados de alto valor engadido. Todo iso redunda nun beneficio directo para a conservación ambiental, a competitividade do sector forestal galego e o benestar das comunidades rurais.

Co obxectivo de apoiar a labor da Fundación Arume no desenvolvemento de actuacións de promoción e dinamización sectorial, propónse a sinatura dun convenio de colaboración coa Axencia Galega da Industria Forestal.

Quinta.- Na Lei 9/2007, do 13 de xuño, de subvencións de Galicia, está prevista a concesión directa de subvencións cando se acrediten razóns de interese público, social ou económico e, no mesmo sentido, no artigo 36.c, do Decreto 11/2009, do 8 de xaneiro, polo que se aproba o seu regulamento. Por outra parte, no artigo 40.1 do decreto posibilitase a concesión de subvencións directas mediante convenio, nos casos en que se acrediten razóns de interese público, social ou económico.

A Fundación Arume constitúe unha entidade sen ánimo de lucro de referencia no ámbito forestal galego, integrada polos principais axentes da cadea de valor do piñeiro de Galicia, desenvolvendo de forma continuada actuacións de investigación, promoción, transferencia de coñecemento e valorización deste recurso forestal.

A súa composición, experiencia, representatividade sectorial e implantación territorial outórganlle unha posición singular para a execución das actuacións previstas neste convenio, circunstancia que xustifica a concesión directa da subvención ao abeiro do artigo 19.4 c) da Lei 9/2007, do 13 de xuño, de subvencións de Galicia.

II. OBXECTO DA MEMORIA

A presente memoria ten por finalidade xustificar o acerto e a oportunidade da formalización dun **Convenio de colaboración entre a AXENCIA GALEGA DA INDUSTRIA FORESTAL e a FUNDACION ARUME**, para instrumentar unha subvención directa da Xunta de Galicia á Fundación Arume, a través da Axencia Galega da Industria Forestal, para o desenvolvemento de actuacións de estudo, diferenciación e dinamización sectorial así como a promoción e posta en valor da cadea monte-industria de Galicia e, en particular, daquela vinculada ó aproveitamento e transformación do piñeiro.

III. XUSTIFICACIÓN DO ACERTO





O acerto da formalización do presente convenio fundamentase nos seguintes aspectos:

1. Adecuación ás competencias da AXENCIA GALEGA DA INDUSTRIA FORESTAL e actuacións a realizar

A actuación proposta encaixa plenamente nas competencias da AXENCIA GALEGA DA INDUSTRIA FORESTAL, ao promover á mellora da sustentabilidade, resiliencia e produtividade dos sistemas forestais galegos, así como á transferencia de coñecemento e dinamización sectorial .

As actuacións subvencionables son as seguintes.

I- Estudo estratéxico da cadea de valor do piñeiro de Galicia

Abordará a cadea de modo integral, dende o monte ata os produtos finais e combinando a análise económica, social, ambiental, territorial, industrial e de mercado.

Pretenderá dimensionar os valores e a relevancia da cadea e caracterizala, identificando aspectos claves para que, nun contexto cambiante e de competencia global, poida gañar en resiliencia e en capacidade de capitalizar oportunidades. Así mesmo, avaliará a adaptación do recurso madeireiro, en cantidade e calidade, ás necesidades de abastecemento da industria e a súa posible evolución no tempo.

Será unha fonte de información técnica de utilidade, a medio prazo, para a mellora do deseño e implantación das políticas públicas mediante a definición de estratexias e medidas especializadas, a toma de decisións fundamentadas e a avaliación do grao de optimización dos recursos públicos destinados.

Permitirá acadar unha visión integral e compartida da cadea do piñeiro, mellorando a coordinación público-privada, que supoña unha base obxectiva para a toma decisións estratéxicas pola administración autonómica, pola Fundación e, en xeral, polas empresas do sector nos vindeiros anos.

II- Reformulación e impulso da marca de garantía "Pino de Galicia"

Levarase a cabo mediante unha primeira fase de análise do posicionamento actual da marca e de investigación de mercado.

En base ós resultados desta, deseñarase unha estratexia de *rebranding* que contemplará as necesidades que se identifiquen na fase previa de diagnóstico e outras, xa evidenciadas, como a de modificación do regulamento da marca para incluír novos produtos, a revisión dos procesos de certificación e acreditación de entidades certificadoras, a redefinición da misión, visión e valores da marca, a formulación e posta





en marcha dun plan de activación da mesma e de presentación do resultado do *re-branding*.

III- Promoción e difusión da cadea de valor do piñeiro de Galicia

III.a) Encontros intersectoriais

Organizaranse dúas novas edición do encontro intersectorial "Piñeiros", un encontro de carácter profesional que, situando no centro á cadea forestal-madeira de Galicia, articula un espazo que fomenta a cooperación e a hibridación entre sectores, que permite a identificación de boas prácticas, posibilita a transferencia de coñecemento tecnolóxico e investigador arredor, tanto do recurso forestal como da súa valorización mediante a transformación industrial.

Por engadido, servirá para poñer de manifesto os valores históricos, culturais e ambientais do monte galego e do papel que o ámbito forestal pode xogar, actualmente, na mitigación do cambio climático así como a contribución que o aproveitamento, transformación e uso sostible dos recursos forestais poden desempeñar na consecución deste obxectivo.

De modo particular, contemplará a promoción e a valorización da madeira de coníferas de Galicia pola súa directa vinculación e transcendencia como actividade económica desenvolvida, principalmente, no ámbito rural.

A inscrición no encontro será gratuíta e, na definición do programa e configuración do panel de persoas que intervirán, procurarase acadar unha proporción equilibrada en canto ó xénero.

Coa pretensión de maximizar o alcance e impacto do encontro, ademais da asistencia presencial, habilitarase a posibilidade de participación en *streaming* e a gravación colgarase nunha plataforma online de vídeo de acceso público.

III.b) Xornadas e materiais de divulgación dirixidas ó segmento infantil e/ou xuvenil

Organizaranse accións de divulgación dirixidas ó segmento infantil e/ou xuvenil que trasladen ós máis novos, nun ambiente lúdico, o papel que teñen os bosques e as áreas forestais na produción de bens e servizos que necesitan na súa vida diaria así como os seus valores sociais, ambientais e culturais.

As xornadas e materiais de divulgación deberán cumprir os seguintes requisitos:

i) Forma: deberán adoptar a forma de cursos, pímulas formativas, xornadas, talleres, coloquios, festivais, campañas de divulgación, documentais, vídeos, publicacións ou folletos.





ii) Edicións: poderán realizarse nunha ou varias edicións, ben sexa porque se organicen en diferentes localidades ou se repitan noutra data ou horario.

iii) Modalidade de realización: poderán ser presenciais (con asistencia das persoas interesadas nun lugar determinado), en *streaming* ou sen participación directa (como no caso de campañas de divulgación, folletos, etc.).

2. Interese público e ambiental

A sinatura deste convenio responde a razóns de interese público, ambiental, social e económico, na medida en que as actuacións previstas contribúen á promoción da xestión forestal activa e sustentable dos montes galegos e á dinamización económica da cadea monte-industria.

A colaboración coa Fundación Arume permite impulsar actuacións estratéxicas como o estudo da cadea de valor do piñeiro en Galicia ou a revisión da estratexia de promoción e diferenciación do piñeiro a través da marca de garantía "Pino de Galicia".

IV. NATUREZA XURÍDICA

O presente instrumento constitúe un **convenio de colaboración de natureza administrativa**, de conformidade co disposto nos artigos 47 a 53 da **Lei 40/2015, do 1 de outubro, de réxime xurídico do sector público**.

O convenio queda excluído do ámbito de aplicación da **Lei 9/2017, do 8 de novembro, de contratos do sector público**, ao non existir contraprestación económica nin relación contractual onerosa entre as partes.

V.- FINANCIAMENTO

A Axencia Galega de Industria Forestal financiará as accións do presente convenio, con cargo á aplicación orzamentaria 2026 09 A4 741A 481.0 e 2026 09 A4 741A 781.0, código de proxecto 2019.00002 "Promoción e calidade" dos orzamentos xerais da Comunidade Autónoma de Galicia por un importe total de 164.482,66 €.

Código do proxecto	Aplicación	Anualidade 2026	Anualidade 2027	Total
2019.00002	2026 09 A4 741A 481.0	25.636,88 €	33.719,62 €	59.356,50 €
	2026 09 A4 741A 781.0	51.760,87 €	53.365,29 €	105.126,16 €
Total		77.397,75 €	87.084,91 €	164.482,66 €

VI.- GASTOS SUBVENCIONABLES





Terán a consideración de gastos subvencionables:

a) Gastos operativos (capítulo IV): aqueles derivados da execución de actuacións de promoción e difusión da cadea de valor do piñeiro de Galicia.

b) Investimentos en activos intanxibles (capítulo VII): aqueles que darán lugar á xeración de elementos identificables, con vocación de permanencia e uso plurianual, vinculados ao estudo estratéxico da cadea de valor do piñeiro de Galicia e á marca "Pino de Galicia".

O importe máximo por actividades subvencionables será:

.- Nos activos intanxibles : un máximo de subvención de 59.365,50 € o que supón un 75% sobre o total de actuación que é 79.142,00 €

.- nos gastos operativos: un máximo de 105.126,16 € o que supón o que supón un 75% sobre o total de actuación que é 140.164,21 €

O Convenio detalla e desglosa as partidas.

Total activos intanxibles + gastos operativos:

Custe previsto total: 219.310,21 €

Subvención total: 164.482,66 €

VII.- Inexistencia de relación laboral e dereitos de propiedade Intelectual.

A subscrición do convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a Axencia Galega de Industria Forestal.

Todo o persoal que participe ao abeiro do convenio, desenvolvendo as accións descritas, dependerá tanto xurídica como organicamente da Fundación Arume e, en ningún caso, terá vínculo laboral coa Xunta de Galicia. Polo tanto, a Fundación Arume asumirá o pagamento dos salarios, a concesión de permisos, licencias, vacacións e, no seu caso, substitucións; imposición, cando proceda, de sancións disciplinarias e cantos efectos de Seguridade Social se deriven, en particular, o abono de cotizacións e o pagamento de prestacións e cantos outros dereitos e obrigas se deriven da relación contractual entre empregado e empregador.

A Fundación Arume deberá cumprir coa normativa vixente de prevención de riscos laborais para a realización dos traballos aos que se refire o presente convenio, asumindo as responsabilidades derivadas do incumprimento das súas cláusulas.

Arume conservará a titularidade dos dereitos de propiedade intelectual derivado das actuacións realizadas. Non obstante, a Xunta de Galicia disporá dunha licenza gratuíta, indefinida, non exclusiva e sen limitación territorial para a utilización,





reproducción, difusión e explotación institucional dos materiais, estudos, informes, publicacións e recursos audiovisuais elaborados ao abeiro deste convenio.

VIII.- DURACION

O presente convenio producirá efectos dende a súa sinatura ata o 15.12.2027, sen prexuízo de que serán subvencionables os gastos necesarios para a execución das actividades que nel se recollen e nos que se incorrera dende do 01.03.2026.

IX.- NATUREZA XURÍDICA

1. O presente convenio de colaboración ten natureza administrativa e rexerase polas súas cláusulas.

2. En todo o non sinalado, estarase ó previsto na Lei 39/2015, do 1 de outubro de Procedemento Administrativo Común das Administracións Públicas e na normativa autonómica en materia de subvencións. E, en especial, nos artigos 19.4 e 26 da Lei 9/2007, do 13 de xuño, de subvencións de Galicia, e ós artigos 36 a 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia. Así como a aplicación dos principios da Lei 9/2017, de 8 de novembro de Contratos do Sector Público no senso do art.4, para resolver dúbidas ou lagoas. Así coma as previsións da Lei 1/2016, de 18 de xaneiro, de transparencia e bo goberno.

3. Así mesmo, este convenio adáptase ao réxime xurídico dos convenios administrativos establecido nos artigos 47 e 48 da *Lei 40/2015, do 1 de outubro, de réxime xurídico do sector público* e, en particular, ao réxime das subvencións directas instrumentadas mediante convenio previsto no artigo 48.7 da mesma lei.

XI. CONCLUSIÓN

Á vista do exposto, considérase debidamente xustificado o **acerto e a oportunidade da formalización do Convenio de colaboración entre a AXENCIA GALEGA DA INDUSTRIA FORESTAL e a FUNDACION ARUME**, ao permitir o desenvolvemento de actuacións de estudo, diferenciación e dinamización sectorial así como a promoción e posta en valor da cadea monte-industria de Galicia e, en particular, daquela vinculada ó aproveitamento e transformación do piñeiro.

Santiago de Compostela, na data da sinatura electrónica

O Director xeral

Alfredo Fernández Ríos

